



**JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU**

**Sumáriu Kazu**

**Tribunál Distritál Baucau**

**Dezembu 2014**

**Sumáriu prosesu julgamentu kazu iha Tribunál Distritál Baucau-  
Periódú Dezembu 2014**

Introdusaun

Iha Dezembu 2014, JSMP monitoriza kazu 16 hosi totál kazu 29 ne'ebé julga iha Tribunál Distritál Baucau. Kazu 29 ne'e, inklui kazu sira ne'ebé hala'o através hosi julgamentu movel ne'ebé realiza iha Sub-distritu Laga no Baguia no iha Distritu Viqueque ne'ebé JSMP la konsege monitoriza tanba limitasaun orsamentu.

Hosi kazu 16 ne'ebé JSMP monitoriza involve krime omisídiu simples 1, ofensa ba integridade fízika grave ho natureza violénsia doméstika 1, omisídiu negligente no ofensa ba integridade fízika negligente 1, danu simples 1, maus-tratus ba menór ho natureza violénsia doméstika 1, ofensa ba integridade fízika simples ho natureza violénsia doméstika 3, krime hasoru flora no fauna 1, ofensa ba integridade fízika simples 1, danu agravadu 1, abuzu seksuál ba menór 1, danu agravadu no ameasa 1 no krime inséndiu 1. Aleinde ne'e, iha kazu sivíl rua kona-ba indemnizasaun ba danu ne'ebé kauzada hosi sasan, balada ka atividade ruma no kazu puder paternal.

Entre kazu 16 JSMP monitoriza, kazu 7 mak tribunál konklui ona nia prosesu no kazu 9 mak sei iha prosesu nia laran.

Tuir mai deskrisaun sumáriu julgamentu kompletu :

**1. Kazu krime omisídiu simples - Nuc. 0406/12.PDBAU**

Kompozisaun Tribunál	: Singulár
Juis	: Dr. Afonso Carmona
Ministériu Públiku	: Dr. Domingos Barreto
Defeza	: Dr. Grigório de Lima
Konkluzaan	: Adia

Iha 02 Dezembru 2014, Tribunál Distritál Baucau adia prosesu julgamentu ba kazu omisídiu simples tanba arguidu la kumpri notifikasaun hosi tribunál.

Kazu ne'e diskunfia komete hosi arguidu AdC hasoru matebian AdC ne'ebé akontese iha 31 Maiu 2012, iha Suku Fuiluru, Distritu Lautem. Tanba ne'e, tribunál adia fali prosesu julgamentu ba iha 29 Janeiru 2015, iha tuku 10:00 dader.

## **2. Kazu krime ofensa ba integridade fízika grave ho natureza violénsia doméstika-Nuc. 0550/11.PDBAU**

Kompozisaun Tribunál : Koletivu  
Juis : Dr. Antonio Fonseca, Dr. Afonso Carmona no Dr. Hugo da Cruz Pui  
Ministériu Públiku : Dr. Alfonso Lopez  
Defeza : Dr. Grigório de Lima  
Konkluzau : Sei kontinua prosesu

Iha 03 Dezembru 2014, Tribunál Distritál Baucau julga arguida MoS ne'ebé komete krime ofensa ba integridade fízika grave hasoru nia bei-oan (FoS) ho tinan 13. Kazu ne'e akontese iha 27 Novembru 2011, iha Distritu Manatuto.

Ministériu Públiku akuza katak iha 27 Novembru 2011, maizumenus iha tuku 08:00 dader, arguida baku dala barak iha lezada nia liman no ain. Arguida kesi lezada nia liman no ain ho fiu no kontinua baku lezada nia nehan ida to'o monu. Kazu ne'e akontese tanba lezada fakar tiha foos.

Iha tribunál, arguida deklara katak iha 12:00 meudia la'os tuku 08:00 dader, arguida sai hosi servisu fatin (arguida nu'udar funsionária iha Sentru Saúde Manatuto), to'o iha uma arguida hare bee tein nia laiha. Tanba ne'e arguida ba kuru bee iha mota laran hodi tein etu. Depois etu tasak, lezada mós han. Maibé wainhira lezada han lezada halo etu nakfakar tanba ne'e arguida nervoza no foti ai pedasuk ida baku dala barak iha lezada nia ain, liman no kotuk laran to'o lezada monu ba rai. Wainhira monu lezada niaibun kona iha fatuk no resulta nehan ida monu.

Iha parte seluk, lezada deklara katak, arguida baku dala barak iha nia liman, ain, kotuk laran, ulun to'o nia monu ba rai no resulta nia nehan baku kona iha fatuk no nia nehan ida monu. Maske nune'e, lezada deklara katak arguida la kesi nia liman no ain ho fiu.

Iha alegasaun finál, ministériu públiku husu ba tribunál aplika pena ne'ebé adekuada ba arguida tanba konsidera faktus sira ne'ebé akuza ba arguida provadu hotu. Entretantu defeza husu tribunál atu aplika pena adekuadu tanba arguida laiha antesidente kriminais.

Depois rona tiha alegasaun finál hosi parte sira, tribunál marka fali julgamentu ba leitura akordaun iha 20 Janeiro 2015, tuku 14:30 lorokraik.

### **3. Kazu krime omisídiu negligente no ofensa ba integridade fízika negligente - Nuc. 0284/11. PDBAU**

Kompozisaun Tribunál : Singulár  
Juis : Dr. Afonso Carmona  
Ministériu Públiku : Dr. Domingos Barreto  
Defeza : Dr. Grigório de Lima  
Konkluzau : Adia

Iha 03 Dezembru 2014, Tribunál Distritál Baucau adia prosesu julgamentu ba kazu omisídiu negligente no ofensa ba integridade fízika negligente tanba arguidu la kumpri notifikasaun hosi tribunál.

Kazu ne'e involve arguidu MVG hasoru AFB no JM ne'ebé akontese iha 22 Maiu 2011, iha Suku Buibau, Distritu Baucau. Tanba impedimentu ne'e, tribunál adia fali prosesu julgamentu ba 28 Janeiro 2015, tuku 10:00 dader.

### **4. Kazu krime danu simples – Nuc. 0560/11.PDBAU**

Kompozisaun Tribunál : Singulár  
Juis : Dr. Hugo da Cruz Pui  
Ministériu Públiku : Dr. Domingos Barreto  
Defeza : Dr. Juvinal Yanes  
Konkluzau : Kondena ho pena multa US\$60,00 ba kada arguidu

Iha 03 Dezembru 2014, Tribunál Distritál Baucau prezide julgamentu ho agenda leitura sentensa ba kazu danu simples ne'ebé involve arguidu Adão Belo no Maurico Marques hasoru Flaviano Estevão Freitas. Kazu ne'e akontese iha 17 Setembru 2011, iha Suku Bahu, Distritu Baucau.

Tribunál prova katak arguidu sira sai hosi sira nia uma ba lezadu nia fatin no laiha razaun ne'ebé klaru arguidu sira baku monu airin kuluna uma nian hamutuk lolon 12. Maske nune'e tribunál la bele apura loloos prejuízu ne'ebé lezadu hetan, tanba lezadu uza fali ona kuluna hirak ne'e.

Bazeia ba provas hirak ne'e tribunál kondena arguidu sira ho pena multa US\$60,00 ba kada arguidu. Pena multa ne'e sei selu US\$0,50 kada loron durante loron 120. Total pena multa ba arguidu nain rua hamutuk US\$120,00.

Tribunál mós aplika pena alternativa durante loron 80 iha prizaun wainhira arguidu sira la selu pena multa refere. Baarguidu Mauricio Marques kondena mós kustu judisiál US\$10,00.

#### **5. Kazu krime maus tratus ba menór ho natureza violénsia doméstika no ofensa ba integridade fizika simples – Nuc. 0329/12.PDBAU**

Kompozisaun Tribunál : Singulár  
Juis : Dr. Hugo da Cruz Pui  
Ministériu Públiku : Dr. Domingos Barreto  
Defeza : Dr. Juvinal Yanes  
Konkluzauun : Kondena pena prizaun tinan 2 suspenfe ba tinan 3

Iha 03 Dezembru 2014, Tribunál Distritál Baucau prezide julgamentu leitura sentensa ba kazu krime maus tratus ba menór ne'ebé involve arguida EA hasoru JMA (13) no JS (23) nu'udar arguida nia oan. Kazu ne'e akontese iha 04 Marsu 2012, iha Distritu Viqueque.

Tribunál prova katak arguida baku lezadu sira tanba lezadu sira tein tan etu kalan nian, maske etu sei barak hela. Tribunál prova katak arguida baku dala barak iha JMA (lezadu) nia kelen no kauza lezadu hetan kanek. Arguida kaer lezadu nia kanuruk rasta no riba ba iha kama leten no buti lezadu kakorok. Alende ne'e arguida baku dala ida iha JS (lezada seluk) nia ain.

Antes ne'e, ministériu públiku akuza ho artigu 155 Kódigu Penál (KP), maibé iha alegasaun final ministériu públiku husu atu halo alterasaun jurídiku hosi artigu 155 KP ba fali artigu 145 KP.

Bazeia pedidu alterasaun ne'e, tribunál konklui prosesu ne'e no kondena arguida ho pena prizaun tinan 2 fulan 8 tanba provadu komete krime maus tratus ba menór hasoru lezadu JMA. Enkuantu ba lezada JS tribunál kondena ho pena prizaun fulan 1 tanba provadu komete krime ofensa ba integridade fízika simples. Relasiona krime rua ne'e, finalmente, tribunál konklui hodi kondena arguida ho pena úniku ba prizaun tinan 2 suspende ba tinan 3.

#### **6. Kazu krime ofensa ba integridade fizika simples ho natureza violénsia doméstika – Nuc. 0182/14.PDBAU**

Kompozisaun Tribunál : Singulár  
Juis : Dr. Hugo da Cruz Pui  
Ministériu Públiku : Dr. Domingos Barreto  
Defeza : Dr. Juvinal Yanes  
Konkluzauun : Kondena ho pena multa US\$45,00

Iha 03 Dezembru 2014, Tribunál Distritál Baucau prezide julgamentu leitura sentensa ba kazu ofensa ba integridade fizika simples ne'ebé involve arguidu LP hasoru IS nu'udar arguidu nia feen. Kazu ne'e akontese iha 22 Feveireiru 2014, iha Distritu Viqueque.

Tribunál prova katak arguidu tuku dala ida iha lezada nia kotuk laran no dala ida iha lezada nia liman. Kazu ne'e akontese tanba lezada lakohi arguidu telefone feto seluk.

Antes ne'e ministériu públiku akuza katak iha 22 Feveireiru 2014, iha tuku 10:00 dader, arguidu koalia hela ho feto ida liuhosi telefone. Tanba la-kontenti lezada hadau tiha telefone hosi arguidu. Arguidu la simu no dudu lezada monu ba rai. Wainhira lezada hamrik/hader fali, arguidu tuku dala ida tan iha kotuk laran no tuku dala ida iha lezada nia liman karuk.

Relasiona ho aktu ne'e, ministériu públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Nú.7/2010 kona-ba Lei kontra Violénsia Doméstika.

Iha prosesu julgamentu arguidu konfesa no rekoñese katak nia komete duni krime ne'e tuir buat ne'ebé haktuir ona iha akuzasaun ministériu públiku. Aleinde ne'e, arguidu mós deklarara katak nia arrepende nia hahalok.

Iha alegasaun finál, ministériu públiku husu ba tribunál aplika pena prizaun tinan 1 suspende ba tinan 1 fulan 6. Defeza la konkorda ho alegasaun ne'e tanba kondidera arguidu kolabora di'ak ho justisa, konfesa hotu faktus ne'ebé nia komete, arguidu ho lezada di'ak malu ona no laiha antesidente kriminál. Tanba ne'e defeza husu ba tribunál atu aplika pena admoestasaun ba arguidu.

Bazeia ba provas hirak ne'e, ikus-mai tribunál kondena arguidu ho pena multa US\$45,00 ne'ebé sei selu US\$0,50 kada loron durante loron 90. Tribunál mós aplika pena alternativa durante loron 60 iha prizaun kuandu arguidu la selu pena multa refere.

## **7. Kazu krime hasoru flora no fauna – Nuc. 0238/11.PDBAU**

Kompozisaun Tribunál	: Singulár
Juis	: Dr. Afonso Carmona
Ministériu Públiku	: Dr. Domingos Barreto
Defeza	: Dr. Juvinal Yanes
Konkluzau	: Kondena ho pena prizaun tinan 2 suspende ba tinan 3

Iha 03 Dezembru 2014, Tribunál Distritál Baucau prezide julgamentu leitura sentensa ba kazu krime hasoru flora no fauna ne'ebé involve arguidu Xisto Sampaio, Julio Francisco no Frederico P. Correia Ximenes kontra Estadu. Kazu ne'e akontese iha 28 Marsu 2011, iha Suku Pairar, Distritu Lautem.

Tribunál prova katak arguidu Xisto Sampaio no Julio Francisco taa ai kameli maske laiha karta lisensa hosi Diresaun Floresta Ministériu Agrikulta no Peskas. Enkuantu arguidu Frederico P. Correia Ximenes mak sosa ai kameli refere.

Bazeia ba provas hirak ne'e tribunál kondena arguidu Xisto Sampaio no Julio Francisco ho pena prizaun tinan 1 suspende ba tinan 2. Enkuantu ba arguidu Frederico P. Correia Ximenes tribunál kondena ho pena prizaun tinan 2 suspende ba tinan 3.

#### **8. Kazu krime ofensa ba integridade fízika simples – Nuc. 0266/12.PDBAU**

Kompozisaun Tribunál : Singulár  
Juis : Dr. Afonso Carmona  
Ministériu Públiku : Dr. Luis Hernani Rangel da Cruz  
Defeza : Dr. Juvinal Yanes  
Konkluzau : Kondena ho pena multa US\$60,00

Iha 03 Dezembru 2014, Tribunál Distritál Baucau prezide julgamentu leitura sentensa ba kazu krime ofensa ba integridade fízika simples ne'ebé involve arguidu Agustino Pereira da Silva hasoru Januario de Jesus da Silva. Kazu ne'e akontese iha 27 Maiu 2012 iha Suku Bahu, Distritu Baucau.

Tribunál prova katak arguidu diskuti malu ho lezadu tanba lezadu nia bibi tama iha arguidu nia kintal. Tanba ne'e arguidu tuku dala ida iha lezadu nia matan fuku sorin loos.

Bazeia ba provas hirak ne'e tribunál kondena arguidu ho pena multa US\$60,00 ne'ebé sei selu US\$0,50 kada loron durante loron 120, inklui selu kustu judisiál US\$10,00 ba arguidu. Tribunál mós aplika pena alternativa durante loron 80 iha prizaun kuandu arguidu la selu pena multa refere.

#### **9. Kazu krime danu agravadu – Nú. Prosesu : 380/Crm.C/13. TDB**

Kompozisaun Tribunál : Koletivu  
Juis : Dr. Afonso Carmona, Dr. Hugo da Cruz Pui no Dr. Antonio  
Fonseca  
Ministériu Públiku : Dr. Domingos Barreto  
Defeza : Dr. Juvinal Yanes

Konkluzaan : Kondena ho pena multa US\$150,00

Iha 03 Dezembru 2014, Tribunál Distritál Baucau prezide julgamentu leitura akordaun ba kazu danu agravadu ne'ebé involve arguidu Carlito Belo hasoru Sentru Hospitál Distritu Lautem. Kazu ne'e akontese iha 12 Novembru 2011, iha Suku Fuiluru, Distritu Lautem. Tribunál prova katak arguidu foti kadeira masa ida hodi baku rahun lampu neon eletresidade rua tanba parteira sira tarde kura arguidu nia kanek.

Antes ne'e ministériu públiku akuza katak iha 12 Novembru 2011, arguidu ho kondisaun lanu foti kadeira plástiku ida baku rahun lampu neon rua. Aktu ne'e rezulta kadeira tohar no lampu neon rua rahun. Kazu ne'e akontese arguidu monu ho motor no hetan tratamentu tarde hosi parteira sira.

Relasiona ho krime ne'e, ministériu públiku akuza arguidu kontra artigu 259 Kódigu Penál kona-ba danu agravadu.

Iha tribunál, arguidu konfesa faktu sira totalmente bazeia ba ministériu públiku nia akuzasaun. Arguidu deklara liutan katak iha momentu ne'ebá nia lanu no la satisfas ho prosesu atendimentu hosi parteira sira.

Testemuña AdCB nu'udar Diretór Sentru Saúde Distritu Lautem depoimenta katak iha momentu ne'ebá nia la tama servisu. Maibé testemuña rona informasaun hosi seguransa iha sentru saúde refere.

Testemuña ASL nu'udar seguransa iha Sentru Saúde Lautem depoimenta katak iha momentu ne'ebá testemuña esplika ona ba arguidu katak parteira ida de'it no sei atende hela ema partus. Testemuña mós husu ba arguidu atu pasiensia. Maibé la kleur, testemuña rona tarutu, no nia ba hare kadeira ida tohar no lampu neon rua rahun.

Iha alegasaun finál, ministériu públiku husu ba tribunál atu aplika pena prizaun tinan 4 ba arguidu, tanba depoisde akontesimentu arguidu laiha vontade atu hadia ka troka fali sasan estadu nian ne'ebé uza ba interese públiku ne'ebé nia halo aat.

Entretantu defeza husu ba tribunál atu aplika suspensaun ba pena prizaun ba arguidu tanba arguidu konfesa faktus ne'ebé haktuir ona iha akuzasaun ministériu públiku.

Bazeia ba provas hirak ne'e tribunál kondena arguidu ho pena multa US\$150,00 ne'ebé kada loron sei selu US\$1.00 durante loron 150, inklui selu kustu judisiál US\$10,00 ba arguidu. Tribunál mós aplika pena alternativa durante loron 100 iha prizaun, kuandu arguidu la selu pena multa refere.

**10. Kazu krime ofensa ba integridade fízika simples ho natureza violénsia doméstika – Nuc.0296/13.PDBAU**

Kompozisaun Tribunál : Singulár  
Juis : Dr. Afonso Carmona  
Ministériu Públiku : Dr. Domingos Barreto  
Defeza : Dr. Juvinal Yanes  
Konkluzau : Kondena ho pena prizaun fulan 7 no suspende ba tinan 1

Iha 03 Dezembru 2014, Tribunál Distritál Baucau prezide julgamentu leitura sentensa ba kazu ofensa ba integridade fízika simples ne'ebé involve arguidu AAB hasoru MSX nu'udar arguidu nia feen. Kazu ne'e akontese iha 22 Feveireiru 2014, iha Suku Bahu, Distritu Baucau.

Tribunál prova katak arguidu tebe dala ida iha lezada nia kotuk laran no dala ida iha kanotak tanba lezada haruka arguidu kous sira nia oan. Bazeia ba provas hirak ne'e tribunál konklui no kondena arguidu ho pena prizaun fulan 7 suspende ba tinan 1.

**11. Kazu krime abuzu seksuál ba menór – Nuc. 0277/12.PDBAU**

Kompozisaun Tribunál : Koletivu  
Juis : Dr. Afonso Carmona, Dr. Hugo Pui no Dr. Antonio Fonseca  
Ministériu Públiku : Dr. Domingos Barreto  
Defeza : Dr. Juvinal Yanes  
Konkluzau : Sei kontinua prosesu

Iha 03 Dezembru 2014, Tribunál Distritál Baucau julga arguidu GG ne'ebé komete krime abuzu seksuál ba menór hasoru ASFC ne'ebé sei ho idade tinan 10. Kazu ne'e akontese iha 20 Juñu 2013, iha Distritu Baucau.

Ministériu Públiku akuza katak iha 20 Juñu 2013, maizumenus iha oras tuku 12:00 meudia lezada fila hosi eskola, ba uma no troka farda no depois ba kaer boek iha Mota Seisal. Depois lezada ba fa'an boek refere no fa'an besik ho arguidu. Iha momentu ne'ebá arguidu kaer lezada nia liman no dada lezada ba iha duut laran iha nu'u hun ida nia okos, arguidu komesa obriga halo violasaun seksuál hasoru lezada. Maske nune'e, aktu ne'e la konsege realiza tanba lezada nia tian (DdCC) mak toman no hakilar arguidu no informa ba família sira.

Ministeriu Públiku mós akuza katak, iha data no fulan ne'ebé la klaru, iha momentu Estatua St. Antonio tama iha Kapela Seisal, maizumenus iha oras tuku 10:00 dader, lezada la'ó mesak besik iha arguidu nia uma. Momentu arguidu hare lezada, arguidu hakbesik ba



lezada no dada lezada tama liu ba iha arguidu nia kuartu laran no halo violasaun seksuál hasoru lezada. Depois halo tiha violasaun seksuál, arguidu fó osan US\$0,75 ba lezada no dehan ba lezada katak “*ba hola dosi han no loron seluk mai fali*”.

Ministériu Públiku akuza arguidu kontra artigu 177 Kódigu Penál kona-ba abuzu seksuál ba menór.

Iha prosesu julgamentu arguidu konfesa katak iha momentu ne’ebá nia tenta halo relasaun seksuál ho lezada maibé la konsege tanba lezada nia tian toman sira no hakilar nune’e arguidu no lezada mós halai.

Alende ne’e, iha akontesimentu segundu, arguidu konfesa katak nia lori duni lezada tama duni ba iha nia kuartu laran no halo abuzu seksuál ba lezada maibé la konsege hatama nia orgaun seksuál ba iha lezada nia orgaun seksuál.

Tuir-mai, lezada mós deklara katak arguidu lori duni nia ba iha nu’u okos no halo relasaun seksuál maibélakonsege realiza tanba nia tian mak toman. Maske nune’e, iha akontesimentu segundu iha nia uma, arguidu lori nia ba iha arguidu nia kuartu laran no halo duni relasaun seksuál ho lezada. Depois akontese, arguidu fó osan US\$0,50 ba nia.

Iha alegasaun finál, ministériu públiku husu ba tribunál atu aplika pena prizaun tinan 14 ba arguidu tanba arguidu komete violasaun seksuál dala rua hasoru menór. Entretantu defeza husu ba tribunál atu aplika pena ne’ebé adekua ba arguidu.

Depois rona tiha alegasaun finál, tribunál marka fali prosesu julgamentu ba iha 20 Janeiro 2015, tuku 10:00 dader.

## **12. Kazu danu sira kauzadu tanba sasán, animál ka atividade ruma no danu ne’ebé balada sira hamosu-ba– Nuc. 0215/14. Cv.TDB**

Kompozisaun Tribunál	: Singulár
Juis	: Dr. Antonio Fonseca
Advogada ba autora	: Dra. Mujariah
Advogadu ba reu	: Dr. Juvinal Yanes
Konkluzau	: Sei kontinua prosesu

Iha 04 Dezembru 2014, Tribunál Distritál Baucau hala’o tentativa konsiliaun ba batar ne’ebé reu nia karau estraga/han. Kazu ne’e involve Cristina Pereira hanesan autora hasoru Domingos Baros, Pedro Simoes, Joaquim de Oliveira, Alexio Atanacio no Julio de Oliveira hanesan reu sira. Kazu ne’e akontese iha 20 Outubru 2011, iha Suku Alwa Leten, Sub Distritu Baguia, Distritu Lautem.

Iha petisaun inisial autora através hosi nia advogada deklara katak, reu sira kontra artigu 427 Kódigu Sivil kona-ba danu sira kauzadu tanba sasán, animál ka atividade ruma kojuga ho artigu 436 Kódigu Sivil kona-ba danu ne'ebé balada sira hamosu-ba.

Liuhosi petisaun inisial, autora ne'ebé representa hosi nia advogada husu ba tribunál atu kondena reu sira selu fali prejuizu ne'ebé nia hetan tuir valor ne'ebé hatama iha petisaun inisial nia laran ho montante US\$855,00.

Hatan ba petisaun refere, reu sira argumenta katak antes mai tribunál, sira konsege rezolve ona iha nivel suku no reu sira fó ona batar talin 250. Batar talin ida ho osan folin US\$1,00. Aleinde ne'e, reu sira mós fó ona osan US\$40,00 ba autora. Nune'e total osan ne'ebé autora simu hosi reu sira hamutuk US\$290,00. Iha momentu ne'ebá reu sira hakarak atu selu tan US\$300,00 maibé autora lakohi simu.

Iha prosesu konsiliaun ne'e, parte sira la simu malu, tanba ne'e tribunál sei notifika parte sira hodi tuir prosesu saneador.

### **13. Kazu krime danu agravadu no ameasa - Nuc.0237/14. PDBAU**

Kompozisaun tribunál	: Koleтиву
Juis	: Dr. Hugo da Cruz Pui, Dr. Antonio Fonseca no Dr. Afonso Carmona
Ministériu Públiku	: Dr. Luis Hrnani Rangel da Cruz
Defeza	: Dr. Juvinal Yanes
Konkluzau	: Adia

Iha 05 Dezembru 2014, Tribunál Distritál Baucau adia prosesu julgamentu ba kazu danu agravadu no ameasa ne'ebé marka ona atu julga. Prosesu ne'e adia tanba tribunál la prenxe juis koleтиву.

Juis koleтиву na'in ida ba hala'o tiha prosesu julgamentu iha tribunál movel ne'ebé marka ona iha Sub-distritu Baguia, Distritu Baguia. Tanba impedementu ne'e, tribunál adia prosesu julgamentu ba iha 12 Feveireiru 2015, tuku 14:00 dader.

### **14. Kazu sivil podér paternal - Nu. 0142/14.CV.TDB**

Kompozisaun tribunál	: Singulár
Juis	: Dr. Afonso Carmona
Ministériu Públiku	: Dr. Domingos Barreto
Defeza	: Dr. Grigório de Lima
Konkluzau	: Adia

Iha 09 Dezembru 2014, Tribunál Distritál Baucau adia mós prosesu julgamentu ba kazu podér paternal ne'ebé marka ona atu julga. Autór ba kazu ne'e Afina Garcia de Paulo (13), Bernadio de Cunha (7) no Anicio da Cunha (6) nu'udar oan hosi reu na'in rua, Filipe de Benisio no Filipa Benesio Correia.

Tribunál adia prosesu julgamentu tanba reu Filipe de Benisio nu'udar autór sira nia aman la marka prezensa iha tribunál. Kazu ne'e akontese iha 13 Dezembru 2010, iha Sub-distritu Laklo, Distritu Manatuto.

Tribunál seidak marka oráriu foun hodi hala'o fali prosesu julgamentu ba kazu ne'e.

### **15. Kazu krime ofensa ba integridade física simples ho natureza violência doméstica - Nuc. 0173/14. PDBAU**

Kompozisaun tribunál	: Singulár
Juis	: Dr. Afonso Carmona
Ministériu Públiku	: Dr. Domingos Barreto
Defeza	: Dr. Juvinal Yanes
Konkluzau	: Adia

Iha 10 Dezembru 2014, Tribunál Distritál Baucau adia tan prosesu julgamentu ba kazu ofensa ba integridade física simples ne'ebé involve IdC hasoru nia feen (AdC).

Prosesu ne'e adia tanba arguidu no lezada la kumpri notifikasaun hosi tribunál. Kazu ne'e akontese iha 02 Feveireiru 2010, iha Suku Sau, Distritu Manatuto. Ba kazu ne'e mós tribunál seidak determina oráriu foun hodi hala'o prosesu julgamentu.

### **16. Prosesu primeriu interrogatóriu ba kazu krime inséndiu - Nuc. 0014/14. LAL.MR**

Kompozisaun Tribunál	: Singulár
Juis	: Dr. Hugo da Cruz Pui
Ministériu Públiku	: Dr. Alfonso Lopez
Defeza	: Dr. Grigório de Lima
Konkluzau	: Aplika prizaun preventiva

Iha 10 Jullu 2014, Tribunál Distritál Baucau hala'o prosesu primeiru interrogatóriu ba arguidu JM ne'ebé involve iha krime inséndiu hasoru DP (lezadu), iha 09 Dezembru 2014 iha Suku Iliomar, Sub-distritu Iliomar, Distritu Lautem.

Iha 09 Dezembru 2014, tuku 14:00 lorokraik Polísia Sub-distritu Iliomar simu informasaun hosi lezadu katak arguidu JM sunu lezadu nia uma no ahi han mós uma rua seluk.

Relasiona ho aktus ne'e, ministériu públiku akuza arguidu kontra artigu 263 Kódigu Penál kona-ba krime inséndiu.

Iha primeiru interrogatóriu ne'e arguidu deklara katak nia sunu uma tanba odio lezadu. Aktu ne'e rezulta ahi han mós uma rua seluk.

Ministériu Públiku konsidera katak arguidu konfesa faktus sira hotu durante prosesu investigasaun iha polísia. Tanba ne'e, husu ba tribunál atu aplika medida koasaun ne'ebé adekua ba arguidu. Entretantu defeza husu ba tribunál atu aplika medida koasaun ne'ebé adekua maibé prezisa konsidera katak arguidu sofre moras mental.

Depois rona tiha ministériu públiku no defeza sira nia pedidu, tribunál suspende tiha prosesu juglamentu durante oras ida antes hasai despaixu.

Iha despaixu ne'e tribunál konsidera katak arguidu nia hahalok implika perigu kontinuasaun no perturba trankuibilidade publiku. Aleinde ne'e arguidu mós iha antesidente kriminál. Tanba ne'e iha ikus tribunál aplika medida koasaun prizaun preventiva ba arguidu.

Atu hetan informasaun kle'an favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

telefone: 3323883/77295795

webiste: [www.jsmp.tl](http://www.jsmp.tl)

facebook [www.facebook.com/timorleste.jsmp](https://www.facebook.com/timorleste.jsmp)

twitter: @JSMPtl